



d' Basler Dybli L Schwelger



Alti Garde

d' Basler Dybli

## Dr Bärg rieft....

Wenn me d Schwyz bezeichne miesst  
als Land, wo Milch und Honig fliesst  
wo im hehre Morgeroot d Sunne uf de Bärge stoot  
wenn fyr das e Bild miesstsch wäale  
bruuchsch dy gar nit äxtra z quäale  
s Matterhorn derf druff nit fäale !!  
Vor däm helvetische Wunderwärgg  
däm mythisch-zauberhafte Bärge  
sinn mir doch alles Gartezwärg !  
Au fyr d'Wärbig duet sichs loone  
sy setzt im Matterhorn no d'Groone  
und macht's zur Alpe-Tobleroone  
Zerscht hett dä spitzig Schoggi-Mogge  
mit sym Aabligg d Lyt verschrogge und alli blybe dunde hogge  
nummen ain hett gsait, ganz drogge:  
do muess ych aifach uffes-tschogge  
Hundertuffzig Joor sinn's här do hett dr Whympfer gsait, dass är  
the very first dert oobe wäär vo ääne gitte zwoor e Gekäär  
en Italiäner kunnt derhäär...  
dr Whympfer aber sait bezytte  
„Mer wänn nit stritte, geend uf d Sytte  
Gentlemen, I have been born lieber hitt scho als erscht morn  
to be the first am Matterhorn !“  
jä hätt denn das, so froggsch dy gly nit e Schwyzer kenne sy ?  
doch scho, es wäre zwai derby nur laufe die, y hoff seesch's yy  
wie sunsch - hald maischtens....hindedry...  
Also hitt hätt das e baar verdrosse d SVP die hätt scharf gschosse  
zerscht Unterschrifte sammle losse  
und sich zum Kampfruef denn entschlosse:  
s Matterhorn - den Aidgenosse !  
Zum Jubiläum jetz - e Bitt: Sauglattismus wott me nitt  
also miess vor alle Dinge kain blutt oobenaabe springe  
s Vreni Schneider nit go singe  
au wärd s'Horn vom Christo nit verpaggd  
kai Artischt oben ybere gjaggd  
und fyr jedi Feschtreed gilt e Paggd:  
gschwätzt wird im Fünf-Minute-Taggd...  
wär lenger schnuurt, wird grad verglaggt  
s'länggt jo s'normali Alltags-Gfummel  
dr dääglig Radiowanderigs-Rummel  
das marathonmässigi Gipfelrenne  
wo'd bald by Daag und Nacht duesch kenne  
s'git kuum ain, wo nit uffemaag im Summer sinn's 150 im Daag  
friehner bruuchts fyr das none e glungene Kaib  
hütt isch's fyr die maischte ehnder e Hype  
und an gwyse Daage - de seesches kuum y  
kemme d Lyt fascht nimm anenand verby  
kai Wunder muess me jetz dra dängge  
d Uffenthaltszyt uf em Gipfel z beschrängge  
oder jedem wo dundeblybbt - ebbis z schängge...  
s Aesse kasch vergässe, derfsch nur kurz e Schlugg dringge  
sottsch niemertem oobenaabe wingge  
und dien sy bym Laufe au no so stingge  
dramp däm vornedraa trotzdem nit grad uf d'Fingge  
und ebbis isch au verboten am Sail  
gäll machsch kai Selfie - vom undere Körperdail....!  
Schliesslig sottsch , zur Vermiidig vo jeglicher Panne  
bym Glättere nie dr Schirm uffspanne  
und wirf jo nie Kehricht und Fäkalie  
uff die ander Sytte - denn dert isch Italie  
und fyr die wär das nämmlig kai Lappalie...  
wär Abfall muess mache umsverworgge  
dä soll sich am beschte grad sälber entsorge  
D Queen wär au amused gsy, uffez'go  
aber d corgi dogs hätt sy dundegloo  
denn s'haig schynts Angscht die keeniglig Muetter  
s gäb am Matterhorn kai Hundefuetter  
Au dr Philipp wär gärn koo - and needs no rail  
dä hängt scho sit jehäär an ihrem Sail  
Bisch am Oobe nit doobe vor den achte  
gitte d Hörnihütte zum ybernachte  
s hett dert fyr hundertvierzig Blatz  
suechsch ebbis intimers, ganz ohni Rabatz  
no isch das allerdings fyr d Katz  
denn loss der saage, hitt oder morn  
gitte no kai Sexbox - am Matterhorn !  
Wenn d' so ebbis ums Verregge hesch welle  
muesch hald sälber dy Garaasch dert uff stelle...  
Bisch kai Waichei und machsch underwäggs kai Schlängger  
bisch e Läderstrumpf wie als dä Louis Tränker  
oder gsteert wie ne Messner oder e Steck  
no macht sone Matterhorn kai Schregg  
die hänn sich jedem Bärge verschwoore  
und sinn scho in Wanderschueh geboore  
andri sinn - vom Höhekoller bsoffe -  
schynts scho achthundert Mool uff das Matterhorn gloffe  
die hänn doch vo lutter Graggsle sit Joore  
scho gaischtig d'Orientierig verloore  
oder s'isch ene s'Hirni grad ganz yygroore..  
Aber glych - wie vylmool wottsch uffegoo:  
e gueti Sailschaft bruuchts so oder so  
au soone Sailschaft, ganz e bsundri Gilde  
dien dr'Morin und dr Wessels bilde  
aimool hüsch und aimool hott  
kain weiss so richtig, was er wott  
mit dääre Sailschaft kunnsch nundefaane  
scho ebenärdig - nienen aane...  
E wyteri Sailschaft muesch langsam vermisse:  
by Baselstadt- und -land isch's Sail e bitz grisse  
s'goot nimme in die glychi Richtig nämmlig  
zum Bischpill will e jede - s besseri Drämmli  
wenn's so wyter goot, ändet dä Gipfeldanz  
gnau wie friehner wieder - by dr Hülfteschanz  
Dass mir als Gligge e Sailschaft sinn  
isch glaar, macht Sinn, isch fyr jeden e Gwinn  
zum Glättere muess ys kaine zwingge  
denn s'goot jo abwärts, vor alle Dinge  
und dr Spalebärge uff - wird's ys au no glinge  
Als antigg aagleggti Bärgefuhrer-Pfludde  
geen mer guet gryschtet uff unseri Route  
mer sinn en ächti Sailschaft und dien Fasnacht mache  
bruuche s'Matterhorn nit, leens do unde grache  
uns rieft kai Bärge - vo noochem nit und nit vo färn  
D Frau Fasnacht rieft ys - ihre folge-mer gärn !!

Und wenn de au e Bärge wotsch erglimme, goosch an d'Usstellig vo  
de Lampe bym Münster und vo de Requisite by der Kasärne  
(Mäntig zoobe bis Mittwoch demorge)